

Un donacion di buki pa mucha di Aruba Bank

Na biblioteca nan ta felis cu un donacion di buki pa mucha na Papiamentu. Aruba Bank a aserca biblioteca cu e gesto pa duna biblioteca mas cu 100 buki. E aña escolar aki mester mas buki na Papiamentu pa e muchanan por lesa y fia.

Esta, e regalo ta bon bini. E entrega a tuma lugar diabierna atardi cu Roxanne Croes y Francis Croes di Aruba Bank y bibliotecaria Gina Jie Sam Foek. Aruba Bank ta hopi contento di por a haci e donacion di buki na balor di AWG 5000 na Biblioteca. Aruba Bank ta spera di por inspira otro compania of instancianan pa tambe yuda



Biblioteca engrandece su coleccion. Roxanne y Michelle di departamento di Mercadeo cu hopi cariño a bay scohe buki pa biblioteca hubenil su coleccion. Den e cargo tambe

tin buki pa Young Adults y adulto. Un danki grandi na Aruba Bank!

Biblioteca ta ofrece miembrecia gratis pa baby, mucha y hoben bou 18 aña. Esaki ta habri un mundo di buki, storia y informacion den diferente forma, tambe Ebooks y audiobooks. Miles di buki ta warda nan! Biblioteca ta ofrece espacio pa studia, siña, topa y reuni, computers cu Internet y tambe Free WIFI pa un y tur.

Ademas tin espacio pa diferente evento y exposicion. Biblioteca ta habri di dialuna pa diabierna. Pues, 'Ban biblioteca!'

Meneer Porfilio van der Biezen a cumpli 30 aña na EPB San Nicolas

Pa mas cu tres decada, meneer Porfilio van der Biezen cariñosamente yama Porfi pa su coleganan ta trahando na EPB San Nicolas antes Technische school Dr. Martin Luther King.



Un persona dedica, respeta y masha stima pa demas coleganan ya cu Porfi semper ta cla pa yuda y duna un man ora mester. Den presencia di su casa,

su dos yiunan y coleganan, meneer Porfi a ricibi un bunita plakaat for di director, sr. Mathilda sin lubida e palabranan elocuente pa

tur su añanan di dedicacion na nos alumnonan di EPB San Nicolas y e enseñansa di Aruba.

Warawara

Biblioteca Nacional Aruba ta haya un otro obra di un artista visual pa su coleccion, esta di sr. Ephraim Britten.



Ephraim R. Britten a namora cu pintamento tempo cu e tabata chikito. Y semper ela sigi siña pa perfecciona su arte y engrandece su conocimiento di arte. Un y tur ta aprecia y adora su obranan. Nan tin un estilo unico, bo ta reconoce un obra Ephraim Britten di biaha. Su ultimo proyecto grandi tabata pa Museo Arqueologico Aruba. Un serie di obra cu e historia di Aruba como tema principal.

Ephraim Britten ta exhibi e cuadro 'Warawara' na biblioteca como arte publico. Un obra cu un expresion mistico, esoterico y ingenua. Y un simbolo fuerte, esta e Warawara den composicion. Talbes e Warawara ta trece un mensahe di e mundo spiri-

tual? Un composicion cu ta hiba bo den un otro epoca, un otro realidad y un tempo perdi.

Ephraim Britten a nace na Aruba, dia 20 di october 1967 y na 1988 Ephraim a exhibi su obranan na Biblioteca Nacional Aruba. Na 2004 Britten a tene un exposicion na Instituto di Cultura. Den añanan nobenta Ephraim Britten a pinta diferente imahen pa stampia riba peticion di Post Aruba.

**FELIZ DIA
DI PRENSA!**

Prensa ta hunga un rol vital den Aruba su democracia.
Nos mester por depende riba etica y imparcialidad di periodismo.
Aruba lo ta den un gran problema si esaki no ta e caso.
Pabien na tur periodista ariba e día special aki.

BOLETIN EXTRA

Minister di Turismo y Salud Publico
Dangui Oduber

Ministry of Tourism and Public Health

